



Inatsisartut suleriaasianni § 33 naapertorlugu matumuuna Inatsisartut aalajangiiffigisassaattut siunnersuut imaattoq saqqummiupparput:

Danmarkimi kalaallit ilinniartut atugassaannik kollegie-nik sanaartornissaq siunertaralugu Naalackersuisut suliassamik aallartitseqqullugit peqquneqarnissaannik Inatsisartut aalajangiiffigisassaattut siunnersuut.

(Siumup Atassutillu Inatsisartunut ilaasortai)

Tunggavilersuut:

Siumumi Atassummilu nunaqqatitsinnut maanna siunissamilu Danmarkimi ilinniagaqartunut kollegialiornissatsinnut piffissanngortoq isumaqarpugut. Kalallit ilinniagaqartut Danmarkimiikkaluarunik maaniikkaluarunilluunniit toqqissisimanartunik avatangiiseqartariaqarput.

Ullumikkut kalaallit Danmarkimi ilinniagaqartut namminneerlutik inissarsiortariaqartarput aammalumi soorunalimi ineqarnerminnut akiliisarlutik, kollegiami inigisanit akikinnerugunanngitsunut. Tamatumalu saniatigut aamma pisussaaffiit assigiinngitsut ilinniagaqartut namminneerlutik isumagisariaqartarpat.

Ajornartorsiut una nutaajungilaq. Kolligialiornissaq Danmarkimi kalaallit illui minnerunngitsumillu kalaallit Danmarkimi ilinniagaqartut kattuffiat ”AVALAK” qanimut suleqatigalugit pilersaarusiorneqassaaq. Marloqiusamik suliniuteqarsinnaaneq pinngitsoortikkumallugu suliniutip aallartinnginnerani ajornartorsiutit suliniutillu suut aallartisarneqareersimanersut paasissallugu pingaaruteqarpoq.

”Kalaallit Danmarkimi Kalaallillu Nunaanni ilinniagaqartut atugaat, aningaasartuutaallu pillugit misissuineq” AVALAK”-p 2010-mi aggustusimi suliaraa.

Sara Olsvig-ip § 37 naapertorlugu apeqquteqarpoq Naalackersuisut Københavnimi Kalaallit Illuat kalaallinut ilinniagaqartunut kollegialiornissamik pilersaaruteqarnera ilisimanageraat kiisalu Naalackersuisut pilersaarummut qanoq isumaqarnersut, taannalu 03.06.2013 akineqarpoq.

Ilinniartitaanermut Naalackersuisoq akissuteqarnermini pilersaarut ilisimanagerarlugu akivoq, taamattaarlu Ilinniartitaanermut, Kulturimut, Ilageeqarnermut Naligiissitaanermullu Naalackersuisoqarfik Københavnimi Kalaallit Illuannik oqaloqateqartoq oqaatigalugu, pilersaarutillu siuarsimalereersimanagerlugit, taamanikkullu Kalaallit Illuanniit kollegialiornissaq eqqarsaatigalugu 2014-imut Aningaasanut Inatsisissamut atatillugu aningaasaliissutissat qaffanneqarnissannik qinnuteqarniarnermik aalajangernissaq utaqqinneqartoq oqaatigalugu.

AI 2014-imi konto pingaarneq 40.90.02 **Kalaallit Illuinut tapiissutit**, qupperneq 379-imi immikkoortut sisamaanni ima allassimasoqarpoq.

[2014-imiit kontumi pingaarnermi matumani aningaasaliissutit 1,25 mio. kr.-inik qaffaavigineqarput, Københavni Kalaallit Illuanni kalaallit ilinniagaqartut inissaasa pilersinneqarnerinut atatillugu ingerlatsinermut aningaasartuutit amerlinerinut aalajangersimasumik atugassanik. Ilinniartut inaasa amerlanerusunik najugaqarsinnaalernerat attartortitsisarneq tunngaviaglugu pilersinneqarput.]

Ilinniagaqarniartut Danmarkimi ilinnialernissamut tigusaasimallutik tusarlerneqarnermi kingorna Danmarkimi inissamik ujaasinerneq piffissamik atuisarnerat tamaanga killeqartariaqalerpoq. Danmarkimi ilinnialernissamut kissaateqartut siunissami ilinniagaqarnissamut piareersarnermut kiisalu nutaanik sungiusimanngisanillu avatangiiseqalernissamut piareersarnermut piffissartik nalitooq atortassavaat.

Inuusuttut ilinniagaqalernissaasa pingaassussaat oqaatigiuarparput, Danmarkimili ilinniagaqartortatta pitsaasunik avatangiiseqarnissaasa qulakkeernissaat pikkoriffigivallaarsimanngilarput, taamaammallu siunnersuutip Inatsisartuni amerlanerussuteqarluartunit taparserneqarnissaa neriuutigaarput.

Siunnersuutip pisortanut allaffissornikkut aningaasaqarnikkullu kinguneqaatissai

Iliuusissatut pilersaaruserneq Namminersorlutik Oqartussanut allaffissornikkut aningaasartuuteqarnermik kinguneqassaaq. Suliassaq taamaattoq AC-tut atorfilimmit ukiup affaanik sivilisussuseqartumik suliarineqarnissaa ilimagineqarpoq, tamannalu katillugit 250.000 kr.-inik akeqassagatinneqarpoq.

Siunnersuutip namminersorlutik inuussutissarsiutilinnut allaffissornikkut aningaasaqarnikkullu kinguneqaatissai

Soqanngilaq.

Siunnersuutip innuttaasunut allaffissornikkut aningaasaqarnikkullu kinguneqaatissai

Soqanngilaq.